

## 《鵑心吟草》

余處鵑城，日睹花開花落，年歷人來人去，因觸物起情，隨興寓言。或留連光景，相賞無違；亦斟酌典墳，幽感有思。今搜羅散作，都爲一集，雖無豫設作意，略依時序相次，亦足以味向之陳跡。昔望帝化鵑，啼血凝香，至今千春猶昭然也，雖不能羽翼六經，風化天下，庶可慰遷客騷人，使弘血返赤，賀腸復曲，亦不忝所生乎？余以其心相期，名爲《鵑心吟草》。

### 〈榻上〉

永夜紛愁夢不成，涼風孤枕志難平。春心明月竟何去？簾外曉鶯三兩聲。

### 〈雨後文學院庭中〉

禽鳴綴蟲響，小徑紫荆繁。閒看檀添翠，芳菲兩不言。

### 〈鶯〉

雄風傲翅自無儔，遠世凌塵睨九州。衝雨排空寧料及？青雲之上亦堪憂！

離騷：「鶯鳥之不羣兮，自前世而固然。何方圜之能周兮，夫孰異道而相安。」

### 〈夜坐〉

雲海孤明月，幽幽映客心。天風來廓落，秋色作沉深。  
清淚揮湘竹，朱弦藏楚吟。霜中青女在，試賞此希音。

燕臺·夏：「瑤琴愔愔藏楚弄」，則二妃之恨易見而流傳萬古，琴音之悲難傳而終逝一時。

霜月：「青女素娥俱耐冷，月中霜裏鬥嬋娟。」

### 〈懷李白〉

大鵬振翅激天風，志憾滄溟誰與同？詩侍金鑾百官忌，夢遊天姥列仙逢。  
乘桴喪道悲尼父，煉石無方愧葛洪。可嘆煌煌天寶世，鳳雞不辨起兵戎。

玉壺吟：「君王雖愛蛾眉好，無奈宮中妒殺人。」

臨路歌：「仲尼亡兮，誰爲出涕。」

杜甫 贈李白：「秋來相顧尚飄蓬，未就丹砂愧葛洪」

送薛九被讒去魯：「鳳凰宿誰家，遂與群雞匹。」

### 〈偶過文學院庭中作〉

風迴檀翠漫天翻，小徑繽紛轉夕暉。即此靈臺見清澈，長吟閒步不沾衣。

### 〈梅〉

要眇何需綠葉妝？清流麗影映晨光。雖承永夜重重雪，不掩嬌魂細細香。

### 〈書燕臺詩後〉

蜂子花心無限思，星妃環佩竟迷離。柳枝一入公侯府，誰解燕臺悵惘詩？

燕臺·春：「蜜房羽客類芳心。」

### 〈秋日偶成〉

荏苒炎時逝，天清淑氣勻。晴光錯林影，香袖拾花人。  
鶯和詩吟蹇，風翻冊頁新。物生情意富，何戚楚臣貧？

### 〈見雨敗杜鵑作〉

今時雨洗昔時恨，土下碧榮枝上紅。連日霏霏應有盡，啼魂丹志總無窮。

### 〈讀書偶得〉

六經古奧傳迂迴，目澀牙齦遐思開。直似乘驢覓詩客，忽然奇句破天來。

### 〈流蘇〉

仙掌孤擎指繞雲，崑山青玉隱氤氳。若同天露調瓊液，得解凡身五內焚？

### 〈棟花〉

曾是群芳謝最遲，只今春在已辭枝。娉娉粉蝶隨風舞，故惹莊生曉夢疑。

### 〈鶯〉

振翅沖天上，孤臨畿嶽平。羽翎猶散朗，氣骨已貞清。  
欲率絕塵性，還思濡沫情。天女雲變幻，風厲起深鳴。

### 〈臨畢業有感〉

三看山客至今茲，雲樹飛霞動別思。目送鸞鳳乘勢去，面慚負屨潛淵遲。  
史公履虎奇文就，蜀相逢魚壯志遺。詩唱采薇寧有恨？求仁自得此心知。

山客：杜鵑花雅稱。

雲樹：鳳凰木葉密如雲，亦喻友朋闊別。

負屨：龍而非龍，喻未成才也。

龍門遭禍，究天人之良史；南陽受知，敗雄志之偉績。  
雖二子逢遇不同，其不悔一也。